

明大政纂要

明大政纂要卷之十三

明都察院右副都御史四川巡撫茶陵譚希思編輯
成祖文皇帝

帝太祖第四子高后馬氏生也初封燕王建國北平以靖難
卽位在位二十三年壽六十有五葬長陵

洪武三十五年秋七月壬午朔

大祀天地於南郊

甲午享太廟

頒卽位詔於天下大赦

詔曰昔我皇考太祖高皇帝龍飛淮甸汛掃區宇東抵虞淵
西踰崑崙南跨南交北際瀚海仁風惠聲震蕩六合胸爽闇
昧咸際光明三十年間九有寧謐晏駕之日萬方嗟悼煌煌

功業恢於湯武德澤廣布至仁彌流少主以幼沖之姿嗣守大業秉心不順崇信姦回改更成憲戕害諸王放黜師保委政宦豎淫佚無度天變於上而不畏地震於下而不懼災延承天而文其過蝗飛蔽天而不修德禍機四發將及於朕朕爲高皇帝嫡子祖有明訓朝無正臣內有奸惡王得興師討之朕遵奉條章舉義兵以清君側之惡蓋出於不得已也使朕兵不舉天下亦將有聲罪而攻之者少主曾不反躬自責肆行旅拒朕荷天地宗廟之靈戰勝攻克擣之於壩上殲之於白溝破之於滄州潰之於藁城鏖之於夾河輜之於靈璧六戰而已不國朕於是駐師畿甸索其姦回庶幾周公輔成王之誼而乃不究朕懷闔宮自焚自絕於宗社天地所不芘鬼神所不容事不可止朕乃整師入京秋毫無犯諸王大臣

謂朕太祖之嫡嗣順天應人天位不可以久虛神器不可以無主上章勸進朕拒之再三而不獲乃俯徇輿情於六月十七日卽皇帝位所有合行庶政並宜兼舉於是條列赦款惟名在姦臣榜者不宥

命禮部侍郎兼學士董倫致仕

倫宛平人端厚質實志存利人洪武中爲春坊學士出參河南政坐累謫雲南建文中召還嘗建言當務睦親不聽至是年八十餘上命致仕出京數日卒

命吏戶部尙書張統王鈍致仕復前戶部尙書郁新前工部侍郎黃福官

以都督李增枝節制荆襄瞿塘安陸兵備

陞翰林院侍講王景爲學士擢吳府審理副楊士奇爲編修復

翰林院侍書黃淮等爲中書舍人尋陞編修

詔改正建文中所更官制

召陳瑛爲副都御史

初瑛坐通藩謫廣西瑛怨建文諸臣最深卽奏言黃觀廖昇王叔英周是修顏伯瑋皆不順天命宜追戮上曰朕舉義誅邪彼食其祿自盡其心耳悉勿問

擢儒士曾日章爲翰林院侍讀陞助教鄒緝爲侍講改給事中金幼孜王洪及桐城知縣胡儼俱爲檢討

擢大理寺辦事官虞文達爲監察御史

陞主簿周觀政典史國用爲江西山東僉事

二臣皆建文中以御史謫者

命前工部尙書嚴震直戶部致仕尙書王鈍順天府尹薛正言

等巡視河北諸省

擢監生唐友成等十二人俱爲監察御史

陞翰林院待詔解縉爲侍讀修撰胡靖爲侍講編修吳溥楊子榮爲修撰檢討鄭好義爲編修太平訓導蕭引高爲檢討又以應天訓導王汝玉蕪湖訓導張伯潁爲五經博士特改子榮名榮

八月命歷城侯盛庸安戢山東都督劉貞鎮守遼東江陰侯吳高鎮守陝西都督韓觀練兵江西西平侯沐晟鎮守雲南

時江西廬陵縣民有嘯聚劫掠者三司請發兵討之上以官兵一出必傷善良遣行人許子謨齎敕以諭又敕韓觀招撫之旋俱復業

執前刑部尙書侯泰下詔獄死

前戶部侍郎盧迥刑部侍郎胡子昭大理少卿胡閏大常少卿
盧原質左拾遺戴德彝都御史茅大芳皆不屈死之

左僉都御史景清犯駕磔殺之

前吏部尚書張統自經死侍郎毛大亦死之

陞前燕府長史金忠爲工部侍郎

初建內閣

擢監生丁琰姚山林從李晟俱爲給事中

附錄上得建文時羣臣封事千通命解縉檢閱凡言兵食事宜

者畱覽詞涉干犯者焚之問縉等曰爾等宜皆有之眾未對
李貫獨頓首曰臣實未有上曰爾以未有爲美耶國家危急
近待官獨無一言可乎後貫坐累繫獄十年死鄭賜黃福皆
自陳爲奸臣所累乞宥罪上令復其官

九月大封靖難功臣

邱福淇國公朱能成國公並歲祿二千二百石張武成陽侯
鄭亨武安侯火真同安侯顧成鎮遠侯王聰武城侯並一千
五百石陳珪泰寧侯孟善保定侯郭亮成安侯並一千二百
石王忠靖安侯徐忠永康侯張信隆平侯李遠安平侯房寬
思恩侯並一千石徐祥興安伯徐理武康伯李濬襄城伯孫
巖應城伯房勝富昌伯劉才廣恩伯王佐順昌伯陳瑄平江
伯唐雲新昌伯趙彝忻城伯陳旭雲陽伯張玉子張輔信安
伯譚淵子譚忠新寧伯並一千石俱世襲又錄降附功增曹
國公歲祿封永春一侯忠誠等三伯明年封駙馬袁容等二
侯遂追舊功封豐城一侯寧陽等六伯三年復追舊功進封
新城侯六年論平安南功進封新城西平二侯皆爲公又進

封清遠一侯安遠建平二伯終文皇之世凡再大封嗚呼靖
難諸將臣從藩邸起以一旅之師彈丸之地出萬死者三載
遂定宗社於泰山之固此其績誠巨然英主在軍攻堅履危
斷自神授又大戰不過十餘所定軍府不過三四毋論中山
開平卽視曹衛宋潁抑何徑庭若定興之掃安南固偉亦何
能超潁川之下滇蜀且久復失之今高帝之盟白馬指黃河
而誓其功臣鮮有存者易世而後彼所當僅如綫之虜與萑
苻之盜鹵級數十以至百積封自伯而至侯遂有功者又胡
以貂錦蟬聯也孝宗而後稍重名爵不輕畀而不能無畏於
首尾此固未易釐正然至新建之取叛王不煩天子璽書不
費太倉水衡金錢縛之於股掌寧遠之摧東虜積級至萬餘
其所邁敵固皆無瑕其績豈與他徹侯等而摺紳大夫猶斷

斷有後言抑又何哉因並及之以告夫司勳者

陞蹇義爲吏部尙書夏原吉爲戶部尙書劉儁爲兵部尙書改
陳洽爲吏部左侍郎古朴爲戶部左侍郎宋禮爲禮部左侍郎
方賓爲兵部左侍郎黃福爲工部左侍郎大理少卿薛崑爲本
寺卿丞袁復爲本寺右少卿行人李文郁爲通政司左參議

附錄

上問劉儁曰今天下畜馬幾何對曰比年以兵興耗損所

存者二萬三千七百餘匹上曰古者掌兵政謂之司馬問國
君之富數馬以對是馬於國爲最重我朝大僕寺專理馬政
各軍衛皆令孳牧雖建文不君耗損者多然亦考牧無法卿
等各循洪武故事嚴督所司用心孳牧庶幾有蕃息之效

詔諭四夷君長

徙封谷王穗於長沙

廢廣澤王懷恩王爲庶人

擢黃福爲工部尙書

命翰林侍讀解縉修撰胡廣楊榮編修黃淮楊士奇檢討金幼孜胡儼並直文淵閣

時上念機務殷重欲廣聰明措天下於理也乃開內閣於東角門簡諸臣爲耳目腹心日百官奏事退內閣臣造展前密勿謨畫率漏下數十刻始退諸六部大政咸共平章秩五品而恩禮賜賚率與尙書並蓋內閣預機務自此始是時閣中有文淵閣印章獨與諸司異凡封進詔草若登答章奏用之不得下諸司卽下諸司以翰林院印行諸司上內閣亦以翰林院稱已上命吏部言內閣臣侍朕久繼自今考滿直內閣者勿補外益尊重然其後縉出爲交趾參議淮溥下詔獄士

奇榮幼孜事上二十三年官五品不遷而制三公三孤不以授蓋嚴慎如此

逮谷府長史劉璟下獄暴卒

璟劉基仲子也召之不屈遂自經

陞杭州知府虞謙爲大理左少卿

冬十月寧王權來朝改封南昌

先是寧王奏請封欲得杭州上賜書曰杭州昔皇考嘗以封第五子爲吳王後考古制天子畿內不以封諸侯遂改河南建文不遵祖訓封其弟允熲爲吳王眾論非之往嘗許弟自擇封國吾未嘗忘今博咨於眾咸謂建寧荊州重慶東昌皆善地弟可以四郡內擇之庶好經營王府至是來朝明年二月改封南昌

重修太祖高皇帝實錄敕李景隆茹瑺爲監修正副官
以僧道衍爲左善世

二年四月加太子少師復其姓姚賜名廣孝

甘州中衛所軍士張真上疏言事上嘉納之

疏略言曰與侍從大臣講求治道深謀遠慮以保宗社寬恩
霈澤以固人心攬權綱謹號令使上下齊一取忠言納直諫
使下情得達杜僥倖塞讒佞使奸邪不行別是非審好惡求
逸民徵有道取有用黜無益廣公田厚俸祿省刑薄斂擇將
練兵及銳意邊防凡襲職幼官悉改調內地云云上以戍卒
能言賚之衣鈔又謂宋禮曰居其位無其言君子恥之卿等
亦毋默默守位而已未幾義烏教諭上言宜去奸邪而近忠
直上謂部臣曰疏遠之臣猶能存心國事在朕左右受腹心

之託者當思正直自奮用副委任

命戶部尙書王鈍往北平與新昌伯唐雲經度屯種

十一月新作奉天殿成

立妃徐氏爲皇后

詔曰朕荷天地神靈祖宗敷佑繼承大統華夏肅清稽於古
典夏殷周之盛亦資內助以致雍熙朕皇考太祖高皇帝肇
修人紀愷典庸禮臻茲治平薄海內外室家相慶功德兼隆
與天同運亦惟朕皇妣孝慈高皇后效法承天肅雍顯相德
配聖神化家爲國朕正妃徐氏開國元勳中山武寧王徐達
之女達佐朕皇考咸有一德格於皇天天惟申命用休君臣
篤慶榮裕始終毓茲貞淑嬪於肇封家政攸寧朕恭行天討
無內顧之憂厚德嘉貞姆儀懿範同朕恭勤保茲天命君臨

爾萬姓之上是用於洪武三十五年十一月十三日命使奉金冊金寶立徐氏爲皇后正位宮中共承宗廟布告天下咸使聞知

陞解縉爲侍讀學士胡靖黃淮胡儼皆爲侍讀楊榮楊士奇金幼孜皆侍講

以守城功陞北平左布政使郭資保定知府雒僉爲戶刑部尙書仍掌司府事

時資言北平保定永平三府之民初以採集軍隨征有功者已在爵賞中矣其力弱守城者病亡相繼輒取戶丁補役故人民衰耗甚至戶絕田土荒蕪今宜令在伍者籍記其名放還耕種候有緊急仍復徵用其幼小紀錄者乞削其軍籍俾應民差從之時儀賓袁容泰寧侯陳珪皆以缺守備爲言上

曰此輩初以義募今遣還田里宜也竟從資言

封徐景昌爲定國公

景昌鳳陽人父增壽魏國公達次子以文皇后弟爲左軍左都督坐通款燕兵爲建文君所殺上卽位加恩追封武陽侯尋進封公以景昌嗣祿二千五百石世襲正統二年薨子顯忠嗣十三年薨景泰六年子永寧嗣因心疾免朝參支半祿成化十七年薨子光祚嗣掌營府加太師嘉靖六年薨子延德嗣隆慶□年薨子文璧嗣案文皇入纂之頃中宮猶在邸而仲氏已前代開國夫固宜憫其禍收其困而執經者猶疑之然以中山之勲塞天地家有兩公祚及百代不爲過幸也

封駙馬都尉王寧爲永春侯

寧壽州人尙太祖女懷慶公主至是以推戴封祿千石世襲
永樂五年下獄卒孫彝爲指揮僉事

十二月以李至剛爲禮部尙書

戒諭靖難功臣

擢江西儒士軒伯昂爲山東左參議

蘇州嘉定縣民周程上言東吳水利從之

言舊有三江曰錢塘曰吳淞曰婁江民間數百萬錢糧皆仰
給於此吳淞一江跨連蘇松之境東抵滄海西接大湖澱湖
湖水溢則洩於海海潮漲則通於湖近年以來沙土壅塞爲
平地二百五十餘里水脈不通五六月閒天時亢旱高田稻
苗乏水灌溉百姓坐視枯槁至七八月秋雨霖霪湖水漲溢
低下之處盡爲污池通洩無所垂成之禾坐視淹沒至於徵